

PLUS SIAP SEDIA HADAPI PENINGKATAN TRAFIK SEHINGGA 2.2 JUTA SEMPENA MUSIM PERAYAAN TAHUN BAHARU CINA

- Smart Lane Diaktifkan Di 32 Lokasi Tumpuan Trafik
- Rancang Perjalanan Menerusi MyPLUS-TTA Di Aplikasi PLUS
- Sedia 6,000 Petugas Lebuhraya Pastikan Keselesaan Pengguna

Petaling Jaya, 9 Februari 2026:- PLUS Malaysia Berhad (PLUS) menjangka peningkatan trafik sehingga 2.2 juta kenderaan sehari pada Hari-hari Puncak di rangkaian lebuhraya sempena musim perayaan Tahun Baharu Cina yang akan datang. Ini merupakan peningkatan hampir 16 peratus pada hari-hari biasa di rangkaian Lebuhraya PLUS. Jangkaan Hari-hari Puncak di Lebuhraya PLUS adalah pada 12, 13 dan 14 Februari 2026 bagi perjalanan keluar dari Lembah Klang serta 20, 21 dan 22 Februari 2026 bagi perjalanan kembali semula ke ibu kota.

Menurut Pengarah Urusan PLUS, Datuk Nik Airina Nik Jaffar, "PLUS mengambil tiga pendekatan strategik sebagai persediaan menghadapi peningkatan trafik di lebuhraya sempena perayaan Tahun Baharu Cina dengan memberi tumpuan khusus kepada pengurusan trafik dan pengurusan insiden yang lebih efisien, pengagihan trafik dan keselesaan pengguna. Ini selaras dengan komitmen PLUS untuk memastikan pengalaman perjalanan yang lebih selamat, lancar dan selesa kepada 2.2 juta pengguna lebuhraya sepanjang musim perayaan ini."

Datuk Nik Arina berkata demikian pada sesi penutup program 'Jelajah Bersama Media' yang dijalankan di lokasi terpilih sepanjang Lebuhraya Utara-Selatan. Program ini bertujuan meninjau kesiapsiagaan PLUS menguruskan lonjakan trafik sempena perayaan Tahun Baharu Cina, termasuk penambahbaikan kemudahan di kawasan Rehat & Rawat (R&R), hentian sebelah dan plaza tol. Turut hadir ialah Ketua Pegawai Operasi PLUS, Datuk Ir. Zakaria Ahmad Zabidi, Ketua Pegawai Komersial PLUS, Mohd Fauzi Puniran serta barisan pengurusan kanan PLUS.

Menyediakan kemudahan yang ditambah baik untuk keselesaan pengguna

PLUS terus komited meningkatkan keselesaan pengguna melalui penambahbaikan kemudahan awam di lebih 60 lokasi R&R, hentian sebelah dan plaza tol sejak 2023.

Kerja-kerja pembinaan surau baharu sedang dilaksanakan di Hentian Sebelah Behrang (Arah Utara), Hentian Sebelah Sungai Bakap (Kedua-dua Arah) dan Hentian Sebelah Juru (Arah Utara), yang dijangka siap pada suku ketiga tahun ini. Kerja-kerja pembinaan penambahbaikan menyeluruh di Hentian Sebelah Pedas Linggi (Arah Utara) dan Bukit Gantang (Arah Selatan) pula dijadualkan bermula pertengahan tahun ini.

Sebagai sebahagian daripada usaha berterusan meningkatkan pengalaman pengguna, PLUS juga telah menyiapkan penambahbaikan tandas awam di lapan lokasi pada Disember 2025, termasuklah di R&R Mambau (Kedua-dua Arah), R&R Pagoh (Arah Utara), Hentian Sebelah Yong Peng (Arah Utara), Hentian Sebelah Kulai (Arah Selatan) serta beberapa plaza tol.

Selain itu, penambahbaikan tandas di 11 lokasi lain juga sedang berlangsung dan dijangka siap secara berperingkat pada suku kedua dan ketiga tahun ini. Di lokasi-lokasi terlibat, tandas sementara turut disediakan bagi kemudahan orang ramai. Penambahbaikan tempat letak kenderaan juga sedang dijalankan di 6 lokasi dan ianya dijangka siap pada suku kedua dan ketiga tahun ini.

Bagi musim perayaan ini, PLUS turut menambah 26 unit tandas kabin di hentian sebelah dan plaza tol terpilih bagi meningkatkan kapasiti penggunaan pada waktu-waktu puncak. PLUS juga menggalakkan pengguna merancang perjalanan dan memanfaatkan kemudahan awam lain seperti tandas dan surau yang tersedia di kesemua plaza tol sepanjang lebuh raya.

Pengaktifan laluan Smart Lane di 32 lokasi tumpuan trafik

Bagi menguruskan trafik yang efisien sempena musim perayaan akan datang, PLUS akan mengaktifkan laluan Smart Lane di 32 lokasi tumpuan trafik di lebuh raya bagi melancarkan pergerakan trafik. PLUS juga ingin mengingatkan pengguna agar mematuhi arahan lalu lintas, memandu secara berhemah ketika menggunakan Smart Lane serta tidak menggunakan lorong kecemasan di luar lokasi pengaktifan Smart Lane. **(Sila rujuk Lampiran Infografik untuk 32 lokasi Smart Lane)**

Pengagihan Trafik melalui jadual perjalanan digital MyPLUS-TTA

Sebagai persediaan menghadapi peningkatan trafik pada musim perayaan Tahun Baharu Cina yang akan datang, orang ramai dinasihatkan untuk merancang perjalanan lebih awal bagi menikmati perjalanan yang lancar di lebuh raya. Pengguna lebuh raya boleh mendapatkan jadual perjalanan digital MyPLUS-TTA dengan memuat turun dan mengakses aplikasi PLUS untuk memilih waktu perjalanan yang paling optimum di Lebuhraya PLUS dan Lebuhraya Pantai Timur 2 (LPT2) bagi perjalanan di antara 11 Februari hingga 22 Februari 2026. MyPLUS-TTA merupakan pendekatan digital PLUS untuk membantu orang ramai merancang dan memilih perjalanan yang paling sesuai untuk musim-musim perayaan dan waktu-waktu puncak di luar musim perayaan.

Berdasarkan data pola perjalanan musim perayaan Tahun Baharu Cina tahun lalu, pengguna lebuh raya dijangka mengalami peningkatan tempoh waktu perjalanan semasa musim perayaan sekiranya memilih perjalanan di luar cadangan waktu perjalanan MyPLUS-TTA (bergantung kepada keadaan trafik semasa, insiden atau hal-hal luar jangka). Oleh itu, PLUS menyeru orang ramai supaya merancang dan menyusun jadual perjalanan mereka berdasarkan MyPLUS-TTA yang dicadangkan menerusi aplikasi PLUS, bukan sahaja bagi perjalanan keluar dari Lembah Klang tetapi juga bagi perjalanan kembali semula ke Lembah Klang selepas bercuti.

Pada masa yang sama, pengguna lebuh raya juga boleh mendapatkan maklumat trafik terkini menerusi aplikasi PLUS, Pembantu Maya – PUTRI, X@plustrafik, paparan mesej elektronik (VMS) di lokasi-lokasi terpilih atau menerusi saluran stesen-stesen radio utama negara. Orang ramai juga boleh menghubungi talian **PLUSLine di 1800-88-0000** dan **LPT2Line di 1800-88-0220** sekiranya ingin mendapatkan bantuan apabila berlaku kecemasan.

PLUS juga menasihatkan pengguna lebuh raya supaya menggunakan aplikasi PLUS, aplikasi Waze atau *Google Maps* untuk merancang dan mendapatkan status trafik semasa pada musim perayaan kali ini.

-TAMAT-

PERTANYAAN MEDIA:

Mashitah Mohd Arshad Pemangku Ketua Komunikasi Korporat PLUS Malaysia Berhad Telefon Bimbit: 013-209 7092 Emel: mashitah@pl.us.com.my	Rofina Adam Pengurus Komunikasi Korporat PLUS Malaysia Berhad Telefon Bimbit: 012-657 4452 Emel: rofina@plus.com.my
---	---